

Osilá kokutana na bato oyo balukaka yo kaka tango bazali na mikakatano? Soki esilá kokómela yo, oyebi ndenge motema eyokaka — ezalaka malamumu te. Ya solo, bato mosusu bakoki kozanga ntango mpo na koluka yo tango nyonso mpo na mikakatano ya bomoi, kasi bazali mpe bato oyo mpo na bango ozali kaka moto ya kosilisa mikakatano na bango; makambo mosusu nyonso bazalaka na yango te.

Ezalaki na moto moko oyo azalaki kolanda ngai kaka mpo na nasalisa ye na mikakatano na ye. Kasi soki obengi ye kaka mpo na kopesa mbote, ayanolaka te; mbala mosusu abongolaka ata numéro ya telefone mpo okoka kokuta ye te. Kasi nsima ya mwa ntango, akoya lisusu koluka ngai — mpe eloko akosala kaka ezali kosenga lisalisi.

Ata soki osalisi ye, motema ekotuna: mpo na nini boyokani ezala kaka tango ya mpasi? mpo na nini tokoka kozala na boyokani mpe na bantango mosusu nyonso te?

Ezali ndenge moko oyo Nzambe azali koyoka lelo epai ya bato mingi na mokili. Biblia elobi:

□ Yeremia 2:27 (Mokanda na Bomoi)

“Balobaka na nzete: ‘Yo ozali tata na ngai,’ mpe na libanga: ‘Yo nde obotaki ngai.’ Kasi bapesi ngai mokongo, batali ngai elongi te; kasi tango mpasi ekoya bakoloba: ‘Telema mpe bikisa biso!’”

Omoni? Lelo bato mingi bayaka epai ya Nzambe kaka mpo na:

- kosenga bolongoli mikakatano,
- kobondela mpo na kobika,
- koluka bomengo ya mbongo,
- kosenga mosala,
- to biloko mosusu ya bomoi.

Kasi soki otali boyokani na bango na Nzambe, ezali malembe mingi to ezali ata te. Azali na ntango te ya kotánga Biblia mpo na koyeba mokano ya Nzambe na bomoi na ye. Akoki te kolekisa ata miniti 20 mokolo na mokolo na komanyola Liloba ya Nzambe. Kobondela ekómaka mpasi, mpe kokende losambo ezalaka mbala moko na sanza, to mibale kaka — mpe ata akendaka, ezali kaka mpo Nzambe ayanola na libondeli na ye, kasi te mpo na kosambela Ye na Molimo mpe na Solo.

Eloko oyo amonaka pete ezali kokende kosomba mayi ya mapamboli to mafuta mpo asopa yango na mombongo na ye mpo makambo etambola malamumu. To soki bokono makasi eyeli ye, wana nde akokanisa Nzambe. Wana nde akobanda kokila bilei, kobondela mpe kotánga Liloba mokolo nyonso. Kasi mikolo mosusu nyonso azali kaka kobika na masumu.

Ndeko, tosengeli koyeba ete Nzambe asepelaka te na lolenge wana ya bomoi. Nzambe asili koboya bato mingi, kasi bango bayebi te. Yango wana lisalisi ya Nzambe ezalaka mpasi, mpo bomoi na biso ezali ya lokuta liboso na Ye.

Soki tokobi kotánga, Nkolo alobi lisusu:

☐ Yeremia 2:27-29 (Mokanda na Bomoi)

“Balobaka na nzete: ‘Yo ozali tata na ngai,’ mpe na libanga: ‘Yo nde obotaki ngai.’ Kasi bapesi ngai mokongo... tango mpasi ekoya bakoloba: ‘Telema mpe bikisa biso!’ Kasi bazambe na yo oyo osalaki bazali wapi? Tika ete batelema mpe babikisa yo soki bakoki na tango ya mpasi na yo! ... Mpo na nini bozali kotombokela ngai? Bino nyonso botombokeli ngai,” elobi Yawe.

Tomikomisa Nzambe esika ya kosilisa kaka mikakatano na biso te, wana bomoi na biso ezali kokokana te na lobiko. Kotiana tembe na Nzambe ezali te; makambo ya ndenge wana esengeli kosalema te liboso ya Nzambe. Soki moto asali bongo, akoki kokwea na elakeli mabe na esika ya mapamboli.

Yango wana, banda sikoyo:

- toluka Nzambe tango nyonso,
- tosala mokano na Ye,
- tomonisa ete tolingaka Ye na motema ya solo, kasi na lokuta te.

Toluka Nzambe te mpo akómisa biso bato ya bozwi mingi, kasi mpo akómisa biso bana na Ye lokola Yesu Klisto. Na ndenge wana, biloko mosusu nyonso akosunga biso ata kozanga kotia makasi mingi.

Bómikundola: na mikolo oyo ya suka, bato bakokende na Unyakuo (Enlèvement) ezali kaka te baoyo balobaka “nandimi Nzambe,” kasi baoyo basalaka mokano ya Nzambe mobimba kolanda Liloba ya Klisto.

## □ Matai 7:21-23 (Mokanda na Bomoi)

“Moto nyonso oyo alobaka na ngai: ‘Nkolo, Nkolo,’ akokota te na Bokonzi ya Likolo; kasi kaka moto oyo asalaka mokano ya Tata na ngai oyo azali na likolo.

Bato mingi bakoloba na ngai na mokolo wana: ‘Nkolo, Nkolo, tosakolaki te na Kombo na yo? Tobenganaki milimo mabe te? Tosalaki bikamwa mingi te?’

Bongo nakoloba polele: ‘Nayebaki bino ata mokolo moko te; bólongwa epai na ngai, bino bosalaka mabe!’”

Nkolo apesa biso miso ya komona mpe motema ya kosalela Liloba na Ye.

Shalom.

Share on:  
WhatsApp